

TEZAU LITURGIC

3 NOIEMBRIE

SLUJBA

**SF.PREOȚI-MUCENICI
IOAN KESARIISKI
PETRU KOSMINKOV**

*


**SF.DIACON-MUCENIC
SIMEON KRECIKOV**

*

**SF.MUCENIȚE
EVDOCHIA SAFRONOVA
DE LA BÂKOVSK**



**MINEIUL PE NOIEMBRIE
MOSCOVA**



**Месяца ноемврия в 3-й день
Новомучеников Быковских:
священномучеников пресвитеров
Иоанна Кесарийскаго
и Петра Косминкова,
диакона Симеона Кречкова и
мученицы Евдокии Сафроновой**

На велицей вечерни

Блажен муж: 1-й антифон. На Господи,
возвах: стихиры на 8, глас 1:

Начало ныне положим, о братие,/ молению
теплому к новым угодником Божиим:/ тии бо,
страданьми очищаеми,/ рождие плодоносныя
лозы Христовы показашася/ и, сладостию
благодати обильно напаяеми,/ во благоухании
святости нам явишася,/ яко да и мы подвигу их
поревнуим/ и принесем Богу плод покаяния.

Кротцы, но непоколебими пребыли есте,/ новомученицы Быковстии,/ Иоанне, Петре, Симеоне и Евдокие,/ гонителями на смерть обреченнии;/ вам бо и жизнь есть Христос, и смерть приобретение./ Ныне же, на Небесех пребывающе,/ нетленные славы наслаждаетесь и воспеваете:/ благословен еси, Боже, во веки.

Адамантово мужество ваше/ слава есть Церкви Русския,/ страсготерпцы и исповедницы

новии,/ вы бо, гоними и убиваемы,/ непоколебими и тверди пребысте в бедах./ Кто изочтет мучения ваша, скорби и болезни?/ Велия бысть ко Господу любовь ваша/ и во всем яviste себе яко друзи Христови.

Глас 6:

Господи, аще не быхом святыя Твоя имели молитвенники/ и благостыню Твою милующую нас,/ како возмогли быхом врагом нашим противустати/ и отец наших веру сохранить?/ Господи, Многомилостиве и Многоблагодарне!/ Вонми молитве заступников наших Небесных,/ Иоанна, Петра, Симеона и Евдокии,/ и всех новомученик Церкви Русския,/ непрестанно вопиющих к Тебе:/ утверди, Боже, веру Православную во Отечестве нашем.

Отъят Господь поношение от людей Своих,/ устави гонение, посрами безбожнныя,/ дарова торжество Церкви Своей кровьюми новомучеников и исповедников./ Темже, благодаряще Бога о велиих благодеяниих, на нас бывших,/ совершаем днесь память святых угодников Быковских/ и молимся о спасении душ наших.

Слава, глас 8:

Прехвальнии священномученицы Иоанне, Петре и Симеоне,/ купно с мученицею Евдокиею,/ вы сквозе огонь и воду проидосте,/

сего ради отверзошася вам двери райския./ Яко велие дерзновение ко Пресвятей Троице стяжавше,/ Христу за ны молитесь/ даровати душам нашим мир и велию милость.

И ныне, Богородичен: Царь Небесный:

Вход. Прокимен дне и чтения три мученическая.

На литии стихира храма.

Слава, святых, глас 8:

Ныне Церковь небесная ликовствует о множестве чад своих,/ мученицех и исповедницех земли Русския,/ тии бо, мучения многообразная и смерть лютую за Христа приемше,/ внидоша в жизнь безконечную./ Сего ради дадеся им благодать молитися за ны/ и возвещати милости Спаса нашего.

И ныне, Богородичен, глас тойже:

Заступнице усердная,/ Пресвятая Владычице Богородице,/ скорбящих присное Радование/ и Утешительнице призывающих Тя в час испытания!/ Услыши молитвы раб Твоих/ и со страстотерпцы святыми земли нашея/ моли спастися нам.

На стиховне стихиры, глас 6:

Святити страсотерпцы,/ Иоанне, Петре,
Симеоне и Евдокие,/ молим вас мы,
недостойнии:/ призрите на храм Божия Матере,
идеже подвизастесь,/ утвердите ны в вере
Православней/ и вознесите молитву ко
Пресвятей Троице/ о земном Отечестве вашем.

Стих: Честна пред Господем/ смерть
преподобных Его.

Священномученицы Быковстии,/ вы в
страшную годину гонений,/ мучителей
безбожных суровства не убоявшеся,/
многообразныя муки претерпели есте / и залог,
врученный вам,/ цел и невредим сохранили
есте,/ мужески Спаса проповедавше./ Сего
ради, дерзновение имуще ко Господу,/ молитесь
о душах наших.

Стих: Священницы Твои облекутся в
правду,/ и преподобнии Твои возрадуются.

Молитву вознесосте ко Господу,/ Иоанне,
Петре и Симеоне,/ и Тому возвестисте печали
своя, глаголюще:/ се ныне души наша полагаем
за словесныя овцы./ Приими, Господи, молитвы
мученик Твоих,/ яко кадило пред Тобою,/ да
хранит Русь Святая/ веру Православную во
веки.

Слава, и ныне, Богородичен, глас тойже:

Богородице, верным Помощнице,/ помози и ныне рабом Твоим,/ в тяжких обстояниих сущим./ К Тебе прибегаем, Владычице,/ со святыми новомученики Церкви Русския,/ молися спасти души наша.

На благословение хлебов тропарь, глас 6:

В годину огненных искушений Церкви Русския,/ кротость и смирение стяжавше,/ любовь Христову к пастве своей яviste/ и, яко пастыри добрии,/ души своя за ню положисте./ Молитесь о нас священномученицы Иоанне, Петре и Симеоне,/ купно с мученицею Евдокиею,/ спасти и просветити души наша.

На утрени

По 1-м стихословии седален, глас 6:

Крест на рамо взявше/ и Христа всем сердцем возлюбивше, мученицы достохвальнии,/ Того стопам последовали есте/ и заповедь Господню до конца исполнили есте:/ яко больши сея любве никтоже имать,/ да кто душу свою положит за други своя./ И вы души ваша положисте за Церковь Православную./ Ныне же, яко имуще дерзновение ко Христу Богу,/ молитесь о чтущих память вашу.

Слава, и ныне, Богородичен:

Теплое заступление сушим в бедах/ и
Помощницу нашу,/ Еюже безбожия
избавляемся,/ Богородицу, вернии, ублажаем.

По 2-м стихословии седален, глас 8:

Радуйтесь, новомученицы блаженнии,/ яко
ни скорбь, ни теснота, ни гонение,/ ни меч
возмогоша разлучити вас от любви Христовы./ И
ныне прилежно молим вас мы, недостойнии:/ не
забудьте посещати чад своих,/ совершающих
священную память вашу.

Слава, и ныне, Богородичен:

Безвестная, Чистая Богородице Дево,/ не
лиши нас покровы Твоего и заступления во дни
искушений и бед./ Мы же со святыми
новомученики и заступники нашими/
архангельский глас приносим Ти:/ радуйся,
Обрадованная, Господь с Тобою.

Величание:

Величаем вас,/ священномученицы Христови
Иоанне, Петре, Симеоне и святая мученице
Евдокие,/ и чтим честная страдания ваша,/ яже за Христа/ претерпели есте.

Или сие:

Величаем вас,/ святые мученицы Христови
Иоанне, Петре, Симеоне и Евдокие,/ и чтим

честная страдания ваша,/ яже за Христа/
претерпели есте.

Псалом избранный: Бог нам Прибежище и
Сила:

По полиелеи седален, глас 1:

Проидосте сквозе огонь мучений и воду слез,/ и введе вы Господь в покой Свой,/ темже ныне теплии ходатаи к Богу явистесь нам,/ лобызающим подвиг ваш, страстотерпцы Быковстии./ Слава Предуведевшему произволение ваше,/ слава Предуставившему вас к славе Небесней,/ слава Подающему нам молитвами вашими велию милость.

Слава, и ныне, Богородичен:

Ублажим Честнейшую горних воинств Деву Пречистую Богородицу,/ Та бо двери Царствия Небеснаго отверзе/ и ныне на путь спасения наставляет нас, грешных.

Степенна, 1-й антифон, глас 4. Прокимен, глас 4: Тебе ради, Господи,/ умерщвляеми есмы весь день. Стих: Вменихомся, яко овцы закления. Евангелие от Матфеа, зачало 36.

По 50-м псалме стихира, глас 6:

Любве Христовы и благодати Духа Святаго исполнени,/ душетленные страсти победили есте,/ всеблаженнии страстотерпцы

Быковстии,/ и, гонения от беззаконников лютых претерпевше,/ премирных селений достигли есте/ и с лики новомучеников Церкви Русския тамо водворилися есте./ Темже испросите душам нашим мир и велию милость.

Канон святых на 8, глас 6.

Песнь 1

Ирмос: *Яко по суху пешешествовав Израиль,/ по бездне стопами,/ гонителя фараона/ видя потопляема,/ Богу победную песнь поим, вопияше.*

Припев: Святии новомученицы Быковстии, молитесь Бога о нас.

Господи Боже наш, помози нам смиренно воспети подвиги новомучеников Быковских, пресвитеров Иоанна и Петра, диакона Симеона и Евдокии, иже страдания своими внидоша в Чертог Твой Небесный.

Кий словесный дар принесем вам, доблии страстотерпцы Быковстии, вернии свидетелие Слова? Недоумеваем бо достойно воспети величие подвигов ваших, древних мучеников подражателие.

Многи скорби праведным, и от всех избавит я Господь, рече пророк. Темже и вы, прошедше сквозе огонь и воду, в радость жизни вечныя

внидосте и со всеми святыми ныне славу Божию воспеваеете.

Богородичен: Во успении Твоем мира не оставила еси, Владычице, темже покрываеши присно люди Твоя от всяких обстояний и молитвами Твоими избавляеши от смерти души наша.

Песнь 3

Ирмос: *Несть свят,/ якоже Ты, Господи Боже мой,/ вознесый рог верных Твоих, Блаже,/ и утвердивый нас на камени/ исповедания Твоего.*

Кровь вашу, яко спасительное сеяние, земля Русская прият и слава подвигов ваших пределы ея облиста. Темже, благодаряще Господа, торжествуем память вашу, мученицы Быковстии.

Кто Бог велий, яко Бог наш? Ты еси Бог, творяй чудеса – сие вопияху новомученицы Быковстии, претерпевающе мучительства безбожных и веру Христову кровьюми своими утверждающе.

Служителие Божия Матере бысте, страсотерпцы Иоанне и Петре, Симеоне и Евдокие. Темже, велиею любовью к Рождшемуся от Нея исполнившеся, не убоястеся ни мук, ни самыя смерти и венцы подвигов своих приясте.

Богородичен: Премилосердая Мати,
Пречистая Дево, вемы Тя скорую
Утешительницу в напастех и скорбех, подающую
помощь рабом Твоим.

Седален, глас 4:

Тьму неверия словом истины просвещающе,/
на брань духовную противу отступников и
безбожников лютых дерзновенно подвигостеся,/
славнии пастырие наши Иоанне и Петре, с
Симеоном диаконом./ Сего ради, укрепляюще
нас мужески исповедати веру Православную,/
молитесь о спасении душ наших.

Слава, и ныне, Богородичен:

Чудотворною иконою Твоею Владимирскою
древле Отечество наше укрепила еси, Пресвятая
Дево, / такожде и в годину безбожных гонений /
новыя ратоборцы к подвигом мученическим
утвердила еси. / Темже с любовью и
благодарением ублажаем Тя, Пречистая.

Песнь 4

Ирмос: Христос моя сила, / Бог и Господь, /
честная Церковь / боголепно поет, зывающи, /
от смысла чиста, о Господе празднующи.

Славный священномучениче Иоанне,
премудрость книжную разумев, высшее и
совершеннейшее учение Евангельское постиг

еси, и душу твою за овцы стада Христова положил еси.

Дивный священномучениче Петре, ты, научая любить Христа всем сердцем, чад малых и совершенных возрастом учитель был еси, ты и кровию мученическою учение запечатлел еси, темже пастырь усердный и страстотерпец преславный явился еси.

Прехвальный мучениче Симеоне диаконе! Возлюбил еси начало премудрости, страх Господень, темже, во олтаре святем усердно служа, многим благоговением Богу угодил еси. Ныне пред лицом Его поеши, радуясь.

Богородичен: Богородице Дево Пречистая, яко Госпожу, Царицу и Владычицу поют Тя святии новомученицы Церкви Русския. С нимиже приими и наша моления и спаси души наша.

Песнь 5

Ирмос: Божиим светом Твоим, Блаже,/ утренюющих Ти души любовью озари, молюся,/ Тя ведети, Слове Божий,/ истиннаго Бога,/ от мрака греховнаго зывающа.

Оскверненная делы безбожными земля Русская кроплением кровей ваших паки освящается, да познают языцы, яко с нами Бог, и покорятся правде Его.

Вси людие православнии скорби исполнишася, егда безбожнии мучители на Церковь Русскую ополчишася. Вы же, яко воины крепцыи, беззаконию их мужественне противустасте и веру Православную добле утвердисте.

Во мраце безбожия заблуждшим явистесь огневиднии светильницы, Иоанне, Петре, Симеоне и Евдокие, новомученицы преславнии, указующе благочестия путь спасительный.

Богородичен: Пречистая Дево Богомати, Наставнице ищущим спасения, сподоби и нас мыслити, глаголати и деяти точию правая, последующе новомучеником Церкви Русския, яко исповедником твердым.

Песнь 6

Ирмос: Житейское море,/ воздвигаемое зря напастей бурю,/ к тихому пристанищу Твоему притек, вопию Ти:/ возведи от тли живот мой,/ Многомилостиве.

Едема сладчайшаго наследницы показастесь, новомученицы Быковстии, вы бо, скорбни бывше в мире сем, на Небеси ныне утешаетесь; неправды же и гонения претерпевше, жизнь вечную, яко воздаяние праведное, от Бога улучили есте.

Священномученицы Быковстии Иоанне, Петре, Симеоне с мученицею Евдокиею! Вы заточения темничнаго и лютыя смерти не убоялися есте, ныне же в ризах светлых с чинми ангельскими Святей Троице предстоите и молитесь о душах наших.

О, ратницы Христови непобедимии, новомученицы Быковстии! Вы оплот Православия явистесь; оградите убо и нас, немощных в вере, подвиг ваш крестный поминающих.

Богородичен: Богородице Дево, упование христианом, покрый, соблюди, сохрани и спаси Русь Православную, к заступлению Твоему прибегающую.

Кондак, глас 2:

Образ есте чтущим подвиги ваша, / новии страстотерпцы Быковстии, / исповеднически поприще земное претекшии. / Вас бо ни скорбь, ни теснота, ни смерть / от любве Божия разлучити возмогоша. / Темже, страданьми дерзновение стяжавше, / молитесь Христу, вас укрепившему, / да и мы мужества дар от Бога восприимем.

Икос:

Приидите, православнии людие, песньми ублажим новыя светильники Церкви Русския,

Иоанна, Петра, Симеона и Евдокию, теплыя молитвенники, усердныя предстатели, противу безбожия твердыя оружники, души своя за Христа положившия и венцев мученических сподобльшиися. К нимже с любовью припадаем, зовуще сице: радуйтесь, страстотерпцы Быковстии, веру Православную подвигом добрым утвердившии.

Песнь 7

Ирмос: Росодательну убо пещь/ содела Ангел/ преподобным отроком,/ халдеи же опаляющее/ веление Божие, мучителя увеща вопити:/ благословен еси, Боже отец наших.

Господи Боже наш, призри на Церковь Русскую, отврати гнев Твой, на ны движимый, прости грехи и беззакония наша и помилуй нас, предстательством святых сродников наших, непрестанно за ны молящихся.

Господи, молитвами новомучеников Церкви Русския отжени тьму от сердец наших словом Твоея истины, не даждь сатане льстивому погубити души наша, утверди нас в Православии и даруй нам в благочестии пожити вся дни живота нашего.

Дивнии угодницы Божии, славнии мученицы Быковстии, вы, не убоявшеся прещений безбожных, рекли есте: не пощадим естества

тленного, изволим смерть, да венцы победными увяземся от Христа, Бога нашего.

Богородичен: Заступнице усердная, Мати Господа Вышняго, покрый Церковь Русскую державным Твоим покровом, христолюбивым людем на враги споборствуй и надлежащих скорбей душевных и телесных свободи, Мати Дево Пречистая.

Песнь 8

Ирмос: *Из пламене преподобным росу источил еси/ и праведнаго жертву водою попалил еси,/ вся бо твориши, Христе, токмо еже хотети./ Тя превозносим во вся веки.*

Убелисте ризы ваша, доблии новомученицы, кровию Агнца Божия, за человеки закланнаго. Егоже, отроцы, благословите, священницы, воспойте, людие, превозносите во вся веки.

Воистинну друзи Христови явистесе, новомученицы Быковстии, плоть бо и мир возненавидевше, ветхаго человека совлекостесе, во одежду же нетления облекшесе, рекосте: не ктому уже мы живем, но живет в нас Христос.

Рече Господь Своим учеником: не бойся, малое стадо, яко благоизволи Отец ваш дати вам Царство. Вы же, слову сему последующе, чертога Небеснаго достигосте. Темже, славнии

добропобедницы, помозите и нам спасение улучшить.

Богородичен: Пресвятая Владычице Богородице, защити и спаси нас от козней вражиих и многоразличных напастей, даруй нам крепость в терпении, на Тебе бо надеемся и Тобою хвалимся.

Песнь 9

Ирмос: *Бога/ человеком невозможно видети,/ на Негоже не смеют чини Ангельстии взирати,/ Тобою же, Всечистая, явися человеком/ Слово Воплощенно, Егоже величающе,/ с Небесными вои Тя ублажаем.*

На Пречистую Богородицу все упование возложивше, страстотерпцы Быковстии, даже до смерти пострадали есте и, токмо Единого на Небесех Живущаго боящися, Того со всяким дерзновением исповедали есте.

Блаженнии страстотерпцы Быковстии, примите сие смиренное и убогое моление наше, да, верно почитающе память вашу, улучим от Господа и Владыки живота нашего оставление грехов и велию милость.

О, богоизбранныи новомученицы Быковстии, яко звезды, Небо церковное украсившии, молитесь ко Господу о земнем Отечестве вашем и о верою и любовью вас почитающих.

Богородичен: О, Всепетая Мати, аще и разорися от злых храм Твой Владимирский, идеже новомученицы Быковстии подвизашася, но милостию Твоею благоволила еси его во славе обновити. Темже, сошедшеся днесь, благодарственными песньми Тя величаем.

Светилен, глас 1:

Светом Христовым просветившеся,/ святии новомученицы Быковстии,/ во мраце безбожия светильницы верным явистеся,/ страданьми бо вашими и доньне вера Православная проповедуется,/ надежда укрепляется, любовь умножается/ и Церковь Русская доблестию вашею озаряется.

Слава, и ныне, Богородичен, глас тойже:

Приидите, восхвалим Пречистую Матерь Божию,/ Вышшую всех земнородных/ и Честнейшую горних воинств,/ Заступницу усердную рода христианскаго.

На хвалитех стихиры на 4, глас 6:

Приидите, возрадуемся, людие,/ собравшеся в честнем храме Божия Матере,/ и воспоем исповедники Христовы,/ ихже смерть новое рождение бысть/ и страдание венцев приятие./ Темже купно со всею Церковию/ страсотерпцы Быковския прославляем.

Воини добропобеднии/ и светильницы,
верою сияющие,/ безбожия обличителие/ и
прелести разрушителие,/ велегласнии истины
проповедницы,/ святии страстотерпцы Иоанне,
Петре, Симеоне и Евдокие,/ мученическою
кровию в Царствие Небесное возшедшии,/
Христа Бога молителю/ спасти и просветити души
наша.

Водою жизни вечныя напоисте верныя,/
страстотерпцы всеславнии,/ жажду истины
утоляюще/ и огонь безбожных прещений
угашающе,/ темже Божественныя славы
причастницы явистесь/ и страданьями вашими
Христу обручитесь./ Того прилежно, мученицы,
молителю/ мир миру даровати/ и душам нашим
велию милость.

Новомученицы и исповедницы Христови,/ со
всеми святыми земли Русския/ Владыце
предстояще, усердно молитесь,/ да от ересей и
расколов Церковь Свою избавит,/ Отечество
наше в Православии утвердит/ и нас Царствия
Небеснаго сподобит,/ да всегда прославляем
ваше милостивное предстательство.

Слава, глас 8:

Рекоша исповедницы вернии отступником и
безбожником:/ всуе труждаетесь, не льститесь;/
не погибнет бо земля Русская, Богом
возлюбленная,/ но, кровию новых мучеников

напоенная,/ паки просияет верою истинною./
Ныне слово сие исполнися,/ яко Бог прослави
угодники Своя/ и посрами сопротивныя.

И ныне, Богородичен, глас тойже:

Яко Госпожу, Царицу и Владычицу нашу,/ поем
Тя со священномученики Быковскими,/ в державный
Твой покров прибегающе,/ и благодарне зовем
Ти, спасаемии:/ радуйся, Благодатная, с Тобою
Господь.

Славословие великое, ектении и отпуст.

На Литургии

Блаженны от канона святых, песни 3-я и 6-я.
Прокимен, глас 7: Тебе ради, Господи,/ умершвляеми есмы весь день.

Стих: Вменихомся, яко овцы заколения.

Апостол к Римляном, зачало 99. Аллилуиа,
глас 4: Воззваша праведнии, и Господь услыша
их.

Стих: Многи скорби праведным, и от всех их
избавит я Господь.

Евангелие от Луки, зачало 106.

Причастен: Радуйтесь праведнии о Господе,
правым подобает похвала.

**Текст утвержден Священным Синодом
Русской Православной Церкви
14 мая 2018 года
(журнал № 37)**

